

郭襄靖公遺集

郭襄靖公遺集卷之六

莆中 郭應聘君賓著

年友漳浦朱天球君玉編

門人泰和郭子章相奎訂

門人浙江王任重尹卿校

不肖男良翰 梓

奏疏

再撫廣西

六年再考疏

奏爲給由事照得臣見年六十二歲係福建興化

府莆田縣人由進士嘉靖三十年四月除授戶部
山西清吏司主事三十五年三月陞本司署員外
郎事主事本年四月陞本部廣東清吏司署郎中
事主事三十六年二月陞廣西南寧府知府四十
一年二月內陞四川按察司整飭威茂兵備副使
四十三年三月陞廣東布政司左叅政隆慶元年
八月陞廣西按察司按察使二年七月陞廣西布
政司右布政使四年四月陞本司左布政使五年
七月內給由間續准吏部咨爲缺官事該吏部等

衙門會推本年八月二十八日奉

聖旨郭應聘陞都察院右副都御史巡撫廣西地方
欽此欽遵於本年十一月初六日與陞任巡撫都
御史殷正茂交代管事六年三月十一日爲議殄
積惡巨寇以靖地方以復縣治事兵部題覆征剿
古田功次蒙

恩於今職上陞俸一級萬曆元年三月初五日爲仰
仗 天威蕩平府江積惡巨寇飛報全捷事兵部
題覆征剿府江功次蒙

恩陞俸一級萬曆二年四月十三日爲仰仗

天威討平倡惡叛獍恭報全捷事兵部題覆征剿懷
遠功次蒙

恩陞俸一級計自隆慶五年十一月初六日起至萬
曆二年十月初五日止連閏實歷俸三十六箇月
三年考滿已經具

奏照舊復職管事外萬曆二年閏十二月二十八日
爲撞寇糾黨爲患官兵乘勝剿平通論功罪以昭
勸懲事兵部題覆剿過洛容柳城陽朔永寧永福

等處功次奉

聖旨郭應聘陞兵部右侍郎兼都察院右僉都御史
照舊巡撫欽此萬曆三年十一月初二日准吏部
咨爲缺官事該本部會推本年九月初八日奉

聖旨郭應聘陞戶部右侍郎欽此欽遵於本年十二
月初十日與新任巡撫都御史吳文華交代回京
連閏已歷俸一十五箇月零五日行至中途於萬
曆四年二月二十六日丁母憂回籍守制萬曆陸
年九月內該福建撫按衙門具本

奏薦服闋萬曆八年十月十九日准吏部咨爲缺官
事本年九月初三日本部會推奉

聖旨郭應聘著改兵部右侍郎兼都察院右僉都御
史巡撫廣西地方欽此備咨到臣欽遵在籍起程
本年十二月十八日馳至廣西境上接管巡撫事
務和至萬曆十年九月十二日止又歷俸二十箇
月零二十五日連前共三十六箇月前後通計實
歷俸七十二箇月六年任滿例應給由緣臣職任
巡撫責在封疆未敢擅便伏乞

勅下吏部查例上

請定奪臣無任感激隕越之至

奏留事例等銀疏

題爲清查奉

旨解部銀兩事准戶部咨該本部題內開查得商稅
缺官事例等銀盈縮隨時雖難預定若曆日水夫
民快工食等項原有定數亦半不起解或起解不
全中間那移影射欺隱侵匿之弊勢所不免除賊
罰銀已經另本題議通行訖其餘銀兩相應查照

欵數催解等因備咨前來就經案行廣西布政司將前項銀兩逐欵清查有無那移欺隱情弊明白呈報去後今據該司呈稱查得欵內一項撫按贓罰銀已有定額行司遵照無容開報一項吏承納班銀本省司府吏承數少並無納銀下班一項缺官俸給銀一項均徭空役銀一項給引銀各屬向無解有又一項水夫館夫工食銀已經奉文存留各驛遞支應又一項扣減民壯弓兵等役工食銀先年因本省撞賊猖獗議留防守免其扣解及查

奏留之後自萬曆七年九月起至九年終止續收過
缺官柴馬銀一千七十七兩六分七釐一毫二絲
二忽九微七塵商稅銀五百二十一兩五分九毫
魚課銀四十五兩六錢九釐一毫二絲酒稅銀七
十九兩八錢七分六釐防夫工食銀九十六兩納
授儒官事例銀九百一十五兩知印承差正例銀
一千八百三十二兩二分三釐九毫吏農舊例銀
五千一百六十一兩又自萬曆元年起至九年終
止收過曆日銀一千六十一兩六錢四分九釐二

毫五絲以上共收過銀一萬七百八十九兩二錢七分六釐二毫九絲二忽九微七塵俱係見貯在庫續收之數今奉部檄查催似應起解緣粵西素稱貧瘠即正供錢糧俱存留本省支用今所收各項銀兩合無呈乞會題存留以備地方緊急軍需等因到臣看得撫按贓罰近該臣等具題戶部覆議酌定額數題奉

欽依每年遵照解進不敢別議吏承納班亦該臣備查本省布按都三司見役吏承數不滿百各府

吏農尤少並無納銀下班之例已經 奏報其扣
解水夫館夫扣減民壯弓兵各工食該司先年奉
文存留及議免扣解與缺官俸給均徭空役給引
等銀各屬既無解有俱無從起解外如缺官柴馬
商稅課程僧道度牒事例稅畝等項原無定額并
防夫銀數無多緣本省連年用兵軍餉詘乏自萬
曆七年八月以前年分俱經 奏留軍前充餉及
賑濟之用萬曆七年九月以後至九年終止續收
過各項銀兩見貯在庫俱經弔取該司印冊覆覈

相同該臣會同巡按廣西監察御史馬呈圖議照
粵西地方土瘠民貧夷獠錯居營堡羅列一應兵
食皆取給於廣東歲餉與湖廣協濟糧銀但湖廣
歲欠頗多而廣東之銀遇有緊急一時難以轉集
兼以宗祿日增一歲所入誠不足以供一歲之
費該司節年所收缺官柴馬事例等銀俱經奏
留充餉向無解部而目前諸路兵食所賴以稍給
者多係先年奏留存剩之數今支發已盡方有
不繼之憂况夷情叵測意外可虞若將前項見貯

銀兩盡數解部司帑空虛萬一不得已有征剿之舉師行糧從別難措處臣等竊有隱慮焉所擬該司具呈乞將前項銀兩留充兵餉無非思患預防之計相應題

請伏乞

聖明軫念邊徼窮荒

勅下該部再加酌議合無將該司見貯缺官柴馬商稅魚課酒稅防夫納授儒官事例曆日銀共一萬七百八十九兩二錢七分六釐二毫玖絲二忽九

徵七塵准留本省專備地方緊急軍需以後年分仍乞破例

特免解京留備兵餉之助仍行令該司查照原行將有定額與原無定額各項銀兩收支數目每季填報循環送巡按御史倒換年終報部查考如有拖欠俱聽嚴催完納庶兵食有資邊防永固矣

勘報差官身故併叅誤事官員疏

題爲勘報差官身故併叅誤事官員事據左江兵巡道副使徐儒呈奉總督兩廣軍門憲牌仰道委

官查勘差官范可久致死根因依奉行據同知周易等回稱遵依於三月十六日未時起身二十日至太平府左州馱朴驛遇已故范可久弟范可立家人方三余祥范恩并指揮鹿鳴周百戶馬子龍經歷梁翹楚吏目譚應科到彼當喚齊研審得范差官先索謝禮未遂因指留夷杠不發以致夷人伺候日暮徑入臺杠混及本官衣箱失去原領批文忿懼交逼倏然自刎委無別情呈報前來尤恐不的又經牌行潯州南寧二府掌印官會同再審

確報隨據潯州府知府江萬仞南寧府知府陳紀
呈稱遵於四月二十九日會同拘集委官鹿鳴周
梁翹楚譚應科馬子龍奔范可立方三余祥范恩
等到官審處各吐稱范可久於本年二月二十六
日伴送安南夷使梁逢辰等到思明州口稱我奉
差出京知開關舊有酬勞常例緣何到此尚不見
送遂托疾不行比梁逢辰等漫許到關自有厚謝
允事俱託范可久專主遲延至三月初五日起身
初六日到憑祥州該州土官男李德勝指以夷枉

數多中有夾帶違禁貨物爲由遂執留盤檢欲索
常例銀兩范可久因夷使先許厚謝偏護不容盤
詰李德勝用言抵觸挾稱開關常例俱係伴使總
包等語范可久不勝忿恚至初八日方抵關下歇
昭德臺內初九日巳時有憑祥州頭目陸珠因索
常例不得與通事潘應科藉取交杠領狀因而爭
攘搗打至范可久處鹿鳴周喝散隨啓鑰開關日
巳近午范可久辭退各官不許隨班行禮執稱此
事我自張主仍令通事鄧有爲講催所許謝禮彼

學漢書卷之六十一
卷之六十一
九
候

命夷官黃士愷等先因萬曆八年十二月內本道副使徐儒分守道叅議陳尚伊訪知夷人入

貢先年開關舊有贄贈筵宴等項陋規所費甚夥已經出示嚴革及行太平府原任知府劉汝昭南寧府署印同知周易親至關下宣播

朝廷德意一槩謝絕以後不許奉委各官需索該夷人於關外卽豎立碑文崇頌

天朝柔遠至仁夷官黃士愷等遂執出抄謄碑文一

道送范可久看驗常例延不肯送范可久見夷杠
一百四十八杠發出將盡所許常例並未送到因
而執留一十二杠令土兵臺回昭德臺內與自帶
衣箱行李放在一處故意退回食飯口稱天晚待
次日方發關內臺杠夷人因見候久日暮遂乘機
徑入臺內強臺前杠有伴送軍牢土兵向前攔阻
比因人衆互相攘奪致將范可久衣箱搶散及箱
內原領批文一槩混失無蹤范可久思先爲土官
所挾後爲交人所誑又失去批文難以回繳慌懼

忿激退入臥所將隨身之劍自刎倒牀余祥方三等進入見其血流滿衣當即氣絕方三等喊報鹿鳴周等各到臥所看驗委果自刎是的鹿鳴周將關門鎖閉官兵夷人各自散回隨取板木將范可久身屍收殮原自刎劍見送南寧府貯庫衆驗咽喉下刎傷一刀目閉拳握劍見帶鮮血無異初十日譚應科令把關頭目蘇高男蘇黃於布村隘口前去挨查批文并取討交杠領狀夷人即遞出領狀一張并將銀四十兩與蘇黃帶回送范可久

家人等謝步譚應科因范可立等俱隨送身屍至
憑祥州不在將前銀交送太平府貯庫等情隨該
會看得范可久本以輕佻少年竟因忿懼刎死感
出自詒咎將誰諉指揮鹿鳴周職專司關才之預
防經歷梁翹楚吏目譚應科百戶馬子龍不過奉
委伴送小官凡事不能專主土官男李德勝因索
財而侵辱伴使取領狀而扭毆通事法當重處但
近因會勘本道差官先行拘發南寧府監候聽審
病故無容再究等因會呈前來又經拘喚各員役

崇禎朝公遺集 卷二
一
到道面審相同看得差官范可久伴夷使謂居奇
貨指歸杠以要陋規及夷人不堪強臺前杠混失
批文遂以死殉之此其輕生無聊誠意料所不及
者所有同行各失事員役相應分別究治等因備
呈到臣維時巡按廣西監察御史敖選在境患病

杜門候

旨該臣會同總督兩廣尚書陳瑞議照遠夷効順脩
貢

天朝所以優禮賞賚之者 恩至渥也差官人等各

宜祇承 德意恪守法度以無負柔遠之義迺冠
帶通事范可久遠役荒徼志有歉於奉公習聞陋
規心未免於徇貨縱令下人稽留夷杠致使夷人
守候日暮擁衆強臺混失批文加以土官男李德
勝發言抵觸輒爾憤恚自盡旣經委官勘明又有
親弟家人面質情果真確委無他故所據同行與
事各官均屬有罪相應叅究叅照督備龍憑地方
南寧衛指揮使鹿鳴周本以庸才濫承重委平時
怯懦旣無以懾服乎土酋臨事倉皇又不能銷彌

乎禍變相應從重究治者也南寧衛經歷梁翹楚
萬承州吏目譚應科原差肇慶衛達官百戶馬子
龍皆奉護行之委殊無抹正之能視鹿鳴周督備
之責似爲有差當范可久憤激之時均屬坐視相
應量行究治者也憑祥州土官男李德勝本以無
知之性恣其無厭之求指盤詰而需索夷財縱頭
目以凌辱夷使至激差官范可久謂總包常例致
令慙憤自盡而且梟申衝敵駕罪夷人罪惡尤深
但本犯已經監斃足以正法而頭目陸珠仍應嚴

提治罪者安南都統司夷使梁逢辰等奉差脩
貢本出效順之心而攘枉出關似涉逞強之狀事由
有激情尚可原廣西按察司整飭左江兵備兼分
巡道副使徐儒事出卒然智乏預料徒以先期禁
諭足防需索之奸不思臨事難留竟致踈虞之失
但該道駐劄南寧距鎮南關一千三百餘里遙制
爲難姑從免究者也如蒙伏乞

勅下該部再加覆議上

請將一應有罪人員行臣等提問如律庶誤事之官

知有所儆而邊關陋習可永肅於將來矣

慶賀

皇嗣誕生疏

奏爲慶賀事萬曆十年十一月初一日該行人司
行人蔡系周齋捧

詔書恭遇

皇上

元嗣誕生播告中外

恩賚臣民臣欽遵

開讀外臣誠懼誠忤稽首頓首稱賀者伏以瑞藹椒
宮應

五位夢熊之吉祥凝桂殿副

九重詒燕之圖

宗社福延臣民慶協恭惟

皇帝陛下德隆舜孝道裕堯文

卽位以來惟敬天勤民法

祖臨朝而起必脩政講學親賢是用宇宙泰和和氣

尤鍾于彌月華夷禔福福徵首見於

前星康寧同

萬壽之嘉辰清淑得三秋之正氣震爻初索無煩銀

榜之題

渙命遙頒未數金錢之賜

兩宮喜色萬國懽心臣倍切慶私緣羈撫職伏願
治功日茂顯承佑啓咸宜

福履天申富壽多男並集臣無任瞻

天仰

聖欣忭踊躍之至

慶賀 仁聖皇太后疏

奏爲慶賀事萬曆十年十一月初一日該行人
司行人蔡系周齊捧

詔書恭遇

皇上

元嗣誕生播告中外

恩賚臣民臣欽遵

開讀外臣誠懼誠忤稽首頓首稱賀者伏以

坤厚載物弘開祚胤之祥 震索得男茂衍燕詒之

澤歡騰 禁闈慶洽寰區恭惟

聖母仁聖懿安康靜皇太后陛下

寬裕溫柔 端莊靜一 雞鳴獻戒肅雝彌重於

穆皇螽揖垂仁佑啓獨隆于

聖主惟 璇源之積慶斯 玉葉之增榮屢 禱

郊禱熊夢果徵筮簞永延

宗祀龍孫載長 宮庭頌

慈德以難名欣喜色而相告臣職羈萬里慶切

重闈伏願

福並周姜萬世留嗣徽之範

壽同西母四時凝久視之和臣無任欣忭踊躍之至

慶賀 慈聖皇太后疏

奏爲慶 賀事萬曆十年十一月初一日該行人

司行人蔡系周齋捧

詔書恭遇

皇上

元嗣誕生播告中外

恩賚臣民臣欽遵

開讀外臣誠懽誠忭稽首頓首稱賀者伏以

慶源茂積錫祚胤于三秋 慈惠遠詒開本支於百

世

天啓神明之胄地均抃躍之情恭惟

聖母慈聖宣文明肅皇太后陛下

秉德肅雝 怡神制作翼

飛龍于潛邸無慚太姒徽音贊 詒燕於

重闈用紹成王令德 靈神禱祀每祈椒實之多蕃

賢哲篤生奚數蘭芽之獨出家 國奠萬年之業

子孫延一脉之傳奉解澤以騰懽仰

坤寧而誦德臣情深燕廈役繫熊輿伏願

世德滋培福澤衍金枝之盛

母儀永位壽年綿玉曆之長臣無任欣忭踊躍之至

慶賀 皇后疏

奏爲慶 賀事萬曆十年十一月初一日該行人

司行人蔡系周齋捧

詔書恭遇

皇上

元嗣誕生播告中外

恩賚臣民臣欽遵

開讀外臣誠懼誠忭稽首頓首稱賀者伏以

惠溥螽斯福集

皇居之筦簞 仁符麟趾祥開

帝室之箕裘快睹

恩綸彌增

慈慶恭惟

皇后殿下 坤儀合德 統九御以居尊 豫順承

顏奉

兩宮而祗若厚德乃惟風之始純禧一如月之恒頃
惟家 國之禎符莫先熊夢遂啓

禁闈之進御不妬蛾眉用屆兌秋誕生震器所助者
順已徵昌后之休有開必先行致多男之應懽同
二聖慶在

一人臣喜躍彌深趨蹌莫遂伏願

本支日茂永延有典有則之傳

壽祉天申長紹思媚思齋之化臣無任欣忭踴躍之

至

蠲免錢糧疏

奏爲欽奉

聖諭事准戶部咨前事該司禮監傳奉

聖諭朕聞各處帶徵未完錢糧苦累小民着戶部查
節年所欠幾何即今應否悉行蠲免止將見年正
供之數勒限完納還會同兵工二部一併議處來
說欽此欽遵該本部覆議備咨前來隨即案行廣
西布政司通行各府州縣委官清查去後今據該

司造冊呈報到臣該臣會同巡按廣西監察御史
馬呈圖議照廣西前項稅糧皆係歲派定額小民
惟正之供但地方田土硤瘠夷獠錯居兼以頻年
用兵瘡痍未復瘴厲時作民多逃亡是以節年逋
數未完而新糧派徵復起併追愈急輸納愈艱閭
閻之困久矣茲者仰荷

皇上軫念民瘼特發

綸音數年積逋悉與蠲免誠浩蕩

天恩邊氓更生之會也臣等敢不嚴行清查期於民

霑實惠以仰副

蠲恤德意所據該司呈報查過萬曆元二年分各州
縣未完米九萬七千三百九十六石七斗一升五
合九勺六抄折糧銀八千二百九十五兩四分一
釐八毫六絲三忽係在帶徵之數除遵奉

明旨查明蠲免及徧諭通衢窮鄉人戶悉知訖其萬
曆三年起至七年止計五年共該未完米三十三
萬五千一百一十一石五斗四升四合一勺五抄
三撮折糧銀一萬三千一百一十五兩四錢五分

五釐五毫二絲九忽六微三塵七埃雖未題

允帶徵之數既經委官清查果係小民拖欠相應一體蠲免以溥

聖澤伏乞

勅下戶部再加查議將萬曆三年起至七年止前項未完本折銀米覆

請定奪行臣等遵奉施行其萬曆八年以後正徵各項錢糧容臣等嚴督有司催徵俱要依期盡數完納再有拖延遵奉

明旨比舊例從重叅治庶

皇恩既溥而國賦亦清矣

酌議南關善後事宜疏

題爲酌議南關善後事宜以重

國體以綏遠夷事准兵部咨爲差官身故事該臣等

具題憑祥州土官男李德勝土目陸珠等攘奪夷

杠致激差官自盡并該兵科都給事中張鼎思等

題叅玩法官員緣由本部覆議行廣西巡按御史

勘報其邊關憑祥等州善後事宜本部仍移文督

撫衙門加意整飭以後各官目敢有仍前驕逞小則擒捕誅戮大則興師問罪不許姑息養亂等因題奉

欽依備咨前來除差官范可久等事情聽巡按御史勘究具奏外臣等案行廣西布按二司并左江守巡道將邊關憑祥等州善後事宜欽遵查照應該作何議處會議停妥具由呈詳去後今據該司呈該本司署印左叅議李涑會同左江守巡道副使徐儒議將有關欵貢并處置州治事宜開詳

到臣該臣會同總督兩廣尚書陳

議照安南輸

誠脩

貢向無他虞近因憑祥州土官李德勝年

少冥頑不能約束頭目而一時奉委各官坐視需
索釀成爭釁遂至差官范可久憤恚輕生其罪誠
有不得而諉者然閉關之後地方本無別故與鄰
近各土州亦無干預未敢輕議別處以起疑貳之
心所擬該司呈議事宜前來臣等細加參酌條爲
三事一查復各道至關以重彈壓蓋鎮南關乃夷
使出入必經之路其地接壤憑祥先年入貢之

期向該總督兩廣軍門行廣東海北廣西左江二
道會同啓關驗入近年東省有事止行左江守巡
道親至南關督理其事比至夷使由廣東回還總
督軍門止差武職官一員帶領軍兵并行左江守
巡道委官驗放事體相洽亦非一日矣但夷使回
返之時彼中官士夷衆率多叩關祇領

勅書及

頒賞禮物正遠人觀望之際所係匪輕廣東海北廣
西左江各道仍宜親履該地方則一切彈壓機宜

禁戢奸弊自可隨時處置其夷使往來所過內地
照常行各道嚴飭所轄地方防範押送務保無虞
如此則不惟弘敷

天朝無外之仁而亦潛消夷土匪茹之性矣二查立
土族應襲以理州事憑祥州治逼近交南議者見
李德勝旣故遂謂可乘此改土設流不知該州設
在邊界環左右而居者皆土府州縣也彼土官所
以能捍禦邊患者以法令之嚴自擅生殺故耳若
改設流官則邊徼屏蔽以一文吏當之威褻權輕

動爲文法牽制萬一防禦稍疎其所係豈細故哉
且風土不習夷情不諳安能與諸土司共事邊鄙
晏然不觸其猜忌耶見今有官族李仁護印管事
相應行令勘結明白果爲土民信服即准管理州
事鈐束人民催納租賦以定衆心又該州原隸思
明府後乃告改直隸自爲雄長相應查照官制仍
屬該府管轄以便責成如此則不惟杜土酋窺伺
之心且益固邊疆捍衛之勢矣三嚴禁交人常例
以重

國體諸夷使入 貢之期往往攜帶夷物餽送土州
及伴押等官亦有贄贈折儀之餽諸黷貨者習謂
當然其於

國體甚褻前歲開關之始守巡兩道已經呈詳刻石
禁止及回 貢之時土酋惡目踵其陋風動以盤
詰爲詞多方指索至差官武職與隨行人等亦沿
襲夙弊莫可禁諭一拂其欲輒生怨憤致啓釁端
則人心陷溺非一朝夕之故也合無以後入 貢
年分總督軍門先期申飭安南都統使併各土官

及一切押送人員務將非禮之餽盡行禁止但有
土司督備及各伴送員役敢肆需索者聽各該道
盡法叅治如此則官箴旣飭

中朝之體益尊而夷醜嚮風事

上之禮益謹矣伏乞

勅下該部再加酌議上

請行臣等督行該道遵奉施行

欽賞謝 恩疏

奏爲恭謝

身事並公遺集 卷二 二四
天恩事該兵部題覆巡按廣西監察御史馬呈圖題
勘過臣等奏報馬平東歐等處功次緣由節奉

聖旨郭應聘賞銀二十兩紵絲二表裏欽此欽遵隨
於萬曆十一年二月二十二日據承差廖自高齎
捧前項

欽賞銀兩表裏到臣當即祇領望

闕叩頭謝

恩外伏念臣一介草莽再役邊陲竊期保泰銷萌相
安無事非敢勤師動衆以覲成功緣狐豕逋誅尚

恣跳梁之性致士民積憤少伸撻伐之威功本倖
成役非得已皆仰仗

皇稜之遐震誠非人力之與能者也臣猥以駑疲未
效涓滴詎圖

甄錄濫被

恩光幣出尚方沐駢蕃之

三錫金分內帑侈鄭重之百朋蓋

聖德不棄渺遐而微衷彌深驚惕臣敢不益堅末節
務精白以承

休欠彈孤忠期絲毫以報稱臣無任感激屏營之至
薦舉方面官員疏

題爲薦舉方面官員以勵臣工事臣奉

命再撫廣西地方已及三載今當陞任所屬方面官
員大計方竣無可指摘其賢能表著者例應薦揚
訪得布政司右叅政兼僉事整飭府江兵備帶管
分巡道事葉朝陽簡默沉機精明任事察吏治淑
慝昭然指掌飭兵戎搖夷憬爾輸心分守左江道
左叅議李涑諫垣夙彰令望徹省丕著芳聲守左

江盜輯民綏攝司篆風清弊絕分守右江道右叅
議今陞按察司副使彭應時介特中存溫恭外見
討叛獠諸巢渠兇盡獲督版籍全省賦額咸清按
察司提督學校僉事袁昌祚德器完粹學問淵深
褪躬文行兼優人稱金玉校藝華實並重士服鑑
衡以上諸臣皆一時藩臬之良所當薦揚以備擢
用者也伏乞

勅下吏部再加查訪如果臣言不謬將葉朝陽等循
資擢用庶才賢胥勸而治效益臻矣

薦舉有司官員疏

題爲薦舉有司官員以勸吏治事臣奉

命再撫廣西地方已及三載今當陞任所屬有司官員例應舉劾但大計方竣不敢過於苛求其賢能最著者謹列于後訪得桂林府知府傅時望猷爲若利刃輕車操履如冰清玉潔閭閻興頌上下仰成潯州府知府江萬仞百鍊愈精一塵不染處盤根利器自別守僻壤游刃有餘慶遠府知府高文炳負珪璋之器堅冰蘖之操脩誌銳意人文葺城

留情邊計柳州府知府陳大猷念切撫循簡易獨
崇乎大體郡當彫敝操持雅勵乎清脩平樂府知
府周析才達政體志飭官常議夷情協于機宜恫
民艱勤於撫恤平樂府同知鄭應齡文能飾治守
可廉頑三載之勞績懋揚列郡之循良稱最桂林
府同知梁直政成九載守肩一心攝符而案牘聿
清總捕而郊圻無警柳州府同知漆文昌履畝身
先諸屬靖寇勞著東歐瑩潔無疵深沉不露平樂
府同知管賓州事饒敬承濟師十寨功存足食足

兵敷政四封惠在均徭均賦南寧府通判江龍才

諳運于沉毅惠愛本之貞廉士庶歸心豪奸斂手

桂林府推官李道先操履瑩若寒冰剴裁利如芒

刃寬伸肺石頌起口碑平樂府推官顏志邦年資

清茂注措嚴明權稅廉靜有聲查盤精詳得體濤

州府推官何嶺司理廉明迭用一境無冤署符節

愛交流四民胥戴永寧州知州尹廷俊志不怠於

左遷才益練於邊地令行卒伍惠洽民徭橫州知

州丘鏞政先潔已志切安民遷江遺愛猶存橫槎

循績獨茂新寧州知州陳躍潛發庫藏之積奸擒
隣壤之巨寇澤覃豐蔀操絕苞苴永安州知州岳
如厚慈祥有守淑慎不愆均糧持以衡平署事優
乎刃解靈川縣知縣陳一洙剖事不啻發硎操身
有同執玉才誠合一仕學兼優臨桂縣知縣邵以
仁稜冰獨守錯節無難胥史積猾畢懲廂里濫供
盡革容縣知縣伍可受英標偉器卓識通才律已
節著羔羊化民風追鸞鳳貴縣知縣譚耀稜鋒
鏗挺挺高標殘疲加意撫摩積蠹殫心振刷富川

縣知縣周篤棊性資狷介政體剛明節用悉革冗

浮釐奸痛懲豪猾桂平縣知縣孫世禎悃愾不事

浮華溫文雅有執守閭閻戴德邑里傾心遷江縣

知縣劉鳳儀田疇覈于弓量城堞新于堵作明敏

祛弊清靜宜民荔浦縣知縣呂文峰澹素之操精

明之治擒賊足徵心計賑荒益著仁聲宣化縣知

縣陳志願年少中有主裁守堅外無矯飾清糧執

法薄斂厚民懷遠縣知縣李惇力任艱虞志圖振

作威信孚於夷境節省恤乎民瘁以上諸臣皆奉

公恪職所當薦揚者也伏乞

勅下吏部再加查訪如果臣言不謬將傅時望等量
其年資擢用行取庶激勸彰而吏治益奮矣

舉劾武職官員疏

題爲舉劾武職官員以飭軍政事臣奉

命再撫廣西地方已及三載今當陞任所屬武職官
員例應舉劾訪得分守思恩等處地方管理叅將
事副總兵署都指揮同知李應祥胸藏豹畧氣奮
鷹揚討十寨績奏攻心勦東歐功收犄角無慚樽

俎允稱干城此一臣者可備大將之選緣臣等先
經保留十寨善後待三年方議推陞今雖夷情帖
服地方頗寧然衛城方拓屯戍未充似應仍留經
理以終其事者也分守潯梧左叅將署都指揮僉
事白玉年力驍雄夷情諳練專閩宅無田產惟富
談兵承家帳有韜鈴允堪禦侮分守柳慶右叅將
署都指揮僉事金丹通五花之陣法習六甲之奇
韜矍鑠能按劔據鞍勇敢思搴旗破壘都司軍政
掌印署都指揮僉事戴應麟戎機曉暢文藝優

清癯有類於儒生警敏克勝乎閫政都司軍政僉
書署都指揮僉事蔡春及武科奮跡海戰馳名論
兵事而談笑風生督營操而指麾雨集守備昭平
署都指揮僉事武應隆年青猷壯貌偉才雄扼要
險雖江灘風雨猶巡散兵糧即錙粒冰霜自厲守
備永寧署都指揮僉事孫世寶勇銳搗劇寇之羣
甲兵素富清脩絕武人之習保障允資守備慶遠
署都指揮僉事孟宗文技能貫蝨力可剗犀負隅
之寇成擒伏莽之蠻屏跡南寧衛指揮使劉南金

塞寇奏鳴鏡之績勇著戎麾部卒懷挾纊之恩譽
騰柄篆桂林右衛指揮同知許大用夙習將韜兼
通儒術訓練得止齊之度從征多俘馘之功廣西
總兵標下中軍官納級衛鎮撫邵懋勳身工騎射
志悅詩書曉陣法於團花肅軍容于細柳廣西總
兵標下浙江觀海衛武舉鎮撫陳伯勝畫機宜於
十寨一舉成功司操練于團營三軍用命以上諸
臣白玉金丹堪備副將之選戴應麟蔡春及武應
隆孫世寶孟宗文堪任叅遊之寄劉南金許大用

邵懋勲陳伯勝堪任守備之寄者也及訪得管永
寧叅將事遊擊將軍署都指揮僉事周勲識本老
成而動憂掣肘性秉誠篤而氣乏振揚十里之獯
獠未見輸心三鎮之土酋多不用命雖切經營之
志有失彈壓之威此一臣者年力近弱展布終難
所當調用以全器使者也但其生長鬱林久劄大
崗獯獠土兵皆其素所服習建營立鎮皆其近所
籌謀雖不宜於永寧而猶可用於潯梧者况見任
叅將白玉歷官桂林久司閩政其於永寧之夷情

兵計又其所習見而與聞者若將周勳調改潯梧而移白玉以補永寧叅將則周勳不至於終棄而白玉尤得以盡其才矣又訪得遷江屯田千戶所指揮僉事宋良貴性氣兇強心術傾險淫亂不齒於同列賭博甘混于下流考選該所屯政侵糧八十餘石指作拋荒奉委田州催糧受金二百餘兩任其逋負畧賣婦女反嗔縣官盤獲而匿名揭害以遂其奸嚇騙牛馬反指良犇爲盜而捏申剿除以恣其毒官箴大壞民蠹多端潯州衛指揮使楊

森職承汗馬貪肆餓豺科新民年例之禾攫取太甚受重犯買脫之賄法紀何存管屯糧而額外科徵充盈已橐領征哨而無辜受戮冒濫陞銜武弁羞稱輿論共憤以上二臣皆縱恣不檢貪黷無厭所當革職以示懲戒者也伏乞

勅下兵部再加查訪如果臣言不謬將李應祥照舊經理善後另議推陞白玉等循資擢用弁將周勳調改白玉補任宋良貴等革職庶將領咸知勸懲而邊防有賴矣

薦舉教職官員疏

題爲薦舉教職官員事臣奉

命再撫廣西地方已及三載今當陞任所屬教職官員例應薦舉訪得梧州府鬱林州儒學學正鄭學醇立志清脩摘詞古雅鄉校頌采芹色笑成均占振藻才華柳州府融縣儒學教諭蔣行可才思精粹志行高明已徵造士於鱣闈尤足論經於虎觀桂林府興安縣儒學教諭鄧一純芹水傳經儒術薰陶已洽花封製錦吏才宰割無難慶遠府天河

縣儒學教諭趙一鵠端範作人教無慚於蛾術緣
經飾治才必裕於牛刀桂林府靈川縣儒學訓導
李敷年資清雅學識優長苦節旣稱師模通才尤
堪民社以上諸臣雖科貢不同要皆教職之賢內
鄭學醇蔣行可俱堪六館之選鄧一純趙一鵠李
敷俱堪民牧之寄者也伏乞

勅下吏部再加查訪如果臣言不謬將鄭學醇等酌
量擢用廢人才益勸學政有裨矣

薦舉境內人材疏

題爲薦舉境內人材事臣奉

命再撫廣西地方已及三載今當陞任其境內人材
相應薦列以備錄用如原任陝西按察司致仕副
使張孫繩歷省署負正直之聲蹈丘園著清脩之
範西陝之經猷未究東山之物望攸歸原任廣東
惠州府致仕知府李天倫長才無競進之心壯年
有勇退之節志惟殷於菽水望益重於林泉原任
四川按察司僉事降廣東南雄府推官何以尚操
履廉靜志趣高明直聲夙著巖廊清風足正鄉黨

以上三臣皆廣右人才之賢所當薦揚者也伏乞
勅下吏部再加查訪如果臣言不謬及時錄用庶野
無遺賢而

聖治爲益光矣

遵 詔改給 誥命疏

奏爲遵

詔懇乞

天恩改給

誥命事臣伏覩

詔書內開兩京文官一品至九品未及三年考滿者各給與應得誥勅先已給領者與進本等勲階如品同而職銜不同准見任改給欽此欽遵竊照臣由郎署歷官廣西布政使司左布政使陞都察院右副都御史巡撫廣西隆慶六年遇蒙

登極覃恩給臣應得

誥命臣祖伯玉父湍俱累贈通議大夫都察院右副都御史祖母吳氏加贈淑人母卓氏加封太淑人妻余氏加贈淑人繼妻楊氏加封淑人臣萬曆二

年十月初五日三年考滿

誥命未經

請給本年閏十二月二十八日陞臣兵部右侍郎兼
都察院右僉都御史照舊巡撫三年九月初八日
陞戶部右侍郎四年二月二十六日丁母憂回籍
守制服闋八年九月初三日復起改兵部右侍郎
兼都察院右僉都御史巡撫廣西至十年九月十
二日止前後實歷俸六年考滿該吏部題奉

欽依加授資治尹正議大夫恭遇

聖嗣誕生

皇恩覃布誠

熙朝之渥典臣庶之奇逢也緣臣及祖父母父母妻

室原奉

詔命與見任職銜不同相應

請給伏乞

勅下吏部照例改授庶

恩澤溥沾臣舉家均效銜結之報矣臣不勝祈懇隕

越之至

卷之六 終

郭襄靖公遺集卷之七

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰 梓

奏疏

總督兩廣

總督兩廣到任謝 恩疏

奏爲恭謝

天恩事臣前任巡撫廣西地方兵部右侍郎兼都察院右僉都御史於萬曆十一年二月二十八日准吏部咨該本部等衙門會推題奉

聖旨是郭應聘陞都察院右都御史兼兵部右侍郎總督兩廣軍務兼理糧餉帶管鹽法巡撫廣東地方寫勅與他欽此欽遵備咨到臣屢准前任總督兩廣軍務兼理糧餉帶管鹽法兼巡撫廣東地方兵部尚書陳瑞移文催促交代臣以春夏之交正值東粵汛期稽督防禦所繫匪細隨移至蒼梧駐

劄三月初三日交代到任謹望

闕叩頭謝

恩恭候

勅諭至日祇領欽遵外伏念臣本蒲樗弱植畎畝餘
生仰荷

賜環載叨 授鉞幸干羽丕隆于

北闕故鼓鼙頓息於西陲方慮曠瘵重膺

簡命握閫政而兼司鹺政晉臺銜而復領兵銜昔祇
事於一隅已乖素分茲提衡于兩粵益惕愚衷惟

聖明恒矜羸馬之長或諳熟路在微臣久竊畫熊之
器恐致負乘况嶺海之氛侵勢難盡滌而閭閻之
枵柚時已告空蒿目懷憂捫心增懼臣中藏感奮
誼切捐糜欲張遠地之紀綱所急羔羊之節思恤
炎方之物力敢厯螭虎之師矢殫竭於涓埃期報
稱之萬一臣下情無任感戴

天恩之至

哨兵倡變追究釀亂將領疏

題爲哨兵倡變流突隣境追究釀亂將領以肅兵

防事臣於萬曆十一年三月初三日交代駐劄蒼梧案查本年二月二十四日據廣東羅定州東安縣申據帶管巡捕羅苛巡檢司巡檢常鼎報稱本年二月二十日申時有東山營兵出於長春寺墟因酒乘機將墟上菜米布貨等物搶去時各舖客慌忙奔散叫喊有哨官劉一鸞前去禁制被各兵毆打揚言激變口稱本管抽扣錢糧不得給用等情報縣轉報前來又據羅定兵備道僉事侯應爵呈同前事俱該前任督臣陳瑞批行究處及臣交

代之後三月初四日據整飭嶺西兵巡道廣東布政使司右叅政兼按察司僉事徐汝翼補揭前項兵變情由內開先准東山副總兵陳璘手本報稱本山後右二營隊兵約有百餘二月二十日豎旗激變鈔掠居民當即督兵二十三日敵殺叛徒六十四顆招回三十二名緣由報道隨行東安縣知縣陳公大細訪根因據報副總兵陳璘舊年十二月內將魚米發與各兵領食候各兵領糧米每斗扣銀五分魚每斤扣銀一分二釐又將銀放與各

兵每兩收利銀二錢又有後營把總劉宗漢今年
正月內假與各兵借銀每兵二錢托病回衛不還
右營把總陳銘每兵每月扣銀二分以爲薪水二
月本副總又輪撥右後二營兵扯運木植至九星
巖起蓋廟宇以把總陳銘哨官陳相潘麒麟督工
在於教場各相搬戲飲酒并邀哨官陳朝貴黃朝
魁等費過銀兩俱就每兵名下扣銀八分代還酒
席間有不遵多般凌轢且用二拖木正值風雨又
刻期完工枵腹供役饑寒怨恨遂有右營哨官陳

朝貴管下兵黃玉爲首二月二十日在長春墟倡
衆激變前營附近哨官劉一鸞聞知前至禁制被
各兵狠打昏迷倒地即鳴鑼豎旗一百餘人擁至
本縣城外知縣陳公大上城撫諭不從即密會副
總兵陳璘是夜親督官兵蹠踪追撫各徒經過圍
村捉去男婦一十七口內贖回五口追回一十二
口登時殺死七口殺傷續死一口宰食牛五隻猪
十三隻虜掠財物多寡難計沿途燒燬兵營七處
仍殺死塘報一名又准分守西山遊擊葉歡手本

據該山前營哨官馮明報稱閏二月初十日有浪賊二百餘徒潛越中路地方土名掘崗馬貴山聚衆當有中路左營把總王朝相管下哨官李昌下哨長鍾蒼隊長張龍朱達乘馬二匹帶兵一小哨隨夥叛走上山時有哨長鍾蒼即夜脫回報知守備歐泮即差塘報盧有忠前去哨探當被叛兵拿去割耳放回各徒仍劄馬貴地方未去本月二十日又據該山前營把總陳邦武揭報前項叛徒一起置有黃傘及五方旗鼓十七日自掘崗起過中

路白石營各兵知覺奔上山岡遠數三百六十餘
徒十八日過潭僕墟十九日至李村虜去馬六匹
俱不傷虜人口越至廣西交界土名何嶺去訖該
路守備不即撲滅且隱匿不報等因各報到道該
本道會同羅定道復委西寧縣知縣吳道遠會同
東安縣知縣陳公大覆查開報前情無異仍委肇
慶府推官唐民敏親至該地方就近併查另報又
據廣西布政使司右叅政兼按察司僉事整飭府
江兵巡帶管蒼梧兵巡道葉朝陽呈據陸川縣報

閏二月二十日寅卯時分有賊一宗突劫城外北
關民家虜去鄉官教諭陳大諫并各居民三十名
口即退劄六嶺地方據報各賊俱係東山叛兵糾
集各黨流來劫虜斬獲賊級三顆奪獲旗帽生擒
賊犯諸五九并奸細梁棟等三名各備呈到臣當
即牌行該道督行潯梧叅將白玉督兵追捕及行
嶺西兵巡羅定兵備二道督行副總兵陳璘分守
西山遊擊葉歡各督官兵相機剿撫一面將各官
查實叅呈隨摠叅將白玉揭報前虜去鄉官人口

俱已贖回各賊遁回廣東信宜地方去訖三月初六日又據鎮守廣東總兵官黃應甲呈稱東山營兵之叛良由日被脔削困於饑寒苦於工作故攘臂一呼望風響應陳璘方以爲功彌縫不報又不設法招回餘黨率致禍延他邑千戶劉應朝扶同隱匿甚悞軍機迨至流入中路守備歐泮之兵輒與合夥同叛亦非無故而致據親兵陳五鍾四探聽回稱守備歐泮差塘報盧有忠前去哨探當被叛兵拿去割耳放回云歐守備每月將我錢糧尅

減肥已不顧各兵之苦等因該臣併行嶺西兵巡道會同羅定兵備道查照先行明文督令陳璘葉歡等作速出奇計處務令停妥就據西山遊擊葉歡呈稱三月初四日夜風痰陡作語言顛狂至今昏迷伏枕不省人事呈乞暫委一官統領兵務臣以本官方奉擒叛之委輒有此請何其病與行會耶復批嶺西兵巡道查究及暫委練兵遊擊李棟代領官兵會同副總兵陳璘即日前往勦處若各徒黨果能悔禍投降及殺賊贖罪者隨宜撫插并

行該道將各官功罪分別查議呈奪外臣看得羅定本新造之區狼狽雜處反側易生改州建縣立所列營東山有副總兵西山有叅將中路有守備各一員統兵十營分布防守又專設羅定兵備道以司彈壓其控禦之法亦甚密矣一旦變亂猖狂流突隣境各兵之罪固不勝誅然訪求其故皆因朘削所致各將領之罪尤有難以自解者查得二次兵變一在二月二十日一在閏二月初十日臣交代在三月初三日緣督臣陳瑞因聞報致仕不

及具

聞臣當視事之初方切計安之念若不嚴行追究何以示儆將來參照分守東山地方副總兵管參將事署都指揮僉事陳璘給魚米而扣餉銀不顧師徒之枵腹興土木而疲兵力自致部曲之離心患波及於無辜變實成於有激守備中路地方以都指揮體統行事指揮使歐泮平時剋剝旣叢怨於衆心臨事支吾致貽殃於隣壤深屬庸懦無益戎行後營把總劉宗漢假借兵銀托病負約右營把

總陳銘哨官陳相潘麒鳳督工濫費扣餉抵還中路左營把總王朝相哨官李昌撫馭寡恩捕禦無策以上各官其罪均不可追廣東按察司整飭羅定兵備道加陞四品服色僉事侯應爵事由將領固召亂之有因職任兵防實先事之無備近雖報遷責難他諉分守西山地方管叅將事遊擊將軍署都指揮僉事業歡兩兵擁叛雖啓釁於他人一檄督征輒稱病以自諉纓冠之義安在避事之責奚辭除一面檄行道總等官及督令陳璘戴罪督

兵務將各叛徒勦撫寧妥以靖地方外如蒙伏乞
勅下兵部再加查訪覆議上

請分別處治庶

國法昭明人心知所警惕矣

辭免支軍功俸級疏

奏為懇

恩免支軍功俸級以安徽分事照得臣原任巡撫廣
西地方都察院右副都御史隆慶六年三月十一
日為議殄積惡巨寇以靖地方以復縣治事該兵

部題覆征剿古田功次伏蒙

穆宗皇帝賜臣於見職上陞俸一級萬曆元年三月

初五日爲仰仗

天威蕩平府江積惡巨寇飛

報全捷事該兵部題覆臣征剿府江功次荷蒙

聖恩陞俸一級萬曆二年四月十三日爲仰仗

天威討平倡惡叛猺恭

報全捷事該兵部題覆臣征剿懷遠功次又蒙

聖恩陞俸一級俱移咨到臣本年閏十二月內爲謹

寇糾黨爲患官兵乘勝剿平通論功罪以昭勸懲
事兵部題覆臣剿過洛容柳城陽朔永寧永福等
處功次奉

旨陞臣兵部右侍郎兼都察院右僉都御史照舊巡
撫萬曆三年九月吏部會推奉

旨陞臣戶部右侍郎四年二月內丁母憂回籍守制
萬曆八年九月內吏部會推起臣改兵部右侍郎
兼都察院右僉都御史仍巡撫廣西地方至萬曆
十年九月內通前六年考滿吏部照例具題奉

旨加授正議大夫資治尹時均係正三品臣一向遵照

明例係軍功陞俸級後雖陞任仍舊帶支外今蒙聖恩陞臣都察院右都御史兼兵部右侍郎總督兩廣軍務兼巡撫廣東地方已於本年三月初三日交代到任訖臣惟

詔祿養廉固

國家勵世之典而敬事後食寔人臣奉職之常臣應聘駕駘下品藜藿寒生竊祿踰三十年涓埃未效

歷官凡十三轉瘳曠日深頃荷

洪慈復晉今秩階已躋於二品祿亦等乎上卿戴
德無涯俯躬增愧若復循例帶支原陞軍功俸級在
聖明浩蕩之恩賞疑惟厚顧微臣斗筲之器福過生
灾旣懷負乘之憂尤切素餐之懼臣謹披瀝陳瑞
請伏望

皇上鑒臣微衷

勅下該部將臣原陞軍功俸級俯從免支止照見任
正二品事例候歷過月日照數領用庶廩餼不至

虛糜而臣之愚分亦少安萬一矣臣不勝屏營祈懇之至

撫剿叛兵 捷音疏

題爲叛兵糾結撫猺流毒鄰境仰遵

明旨分別撫剿寧戢事該兵部題覆巡按廣東監察御史羅應鶴題叅東山兵叛副總兵陳璘貪殘激變緣由奉

聖旨陳璘虐軍致變姑革了職充爲事官戴罪管事著立功自贖這事情還著總督官巡按御史上緊

勘明具奏羅定新造之區撫安軍民係兵備官專
責侯應爵陞任未代如何輒離信地顯是推避遞
飾姑降一級調用陳公大罰俸半年徐汝翼免究
流劫叛兵著郭應聘作速相機處置毋得玩寇貽
患其餘依擬欽此欽遵臣查得東山哨兵先於二
月二十日中路哨兵於閏二月初十日相繼倡叛
諸撫巢徭賊附和糾合越劫廣西陸川地方時前
任總督兩廣兵部尚書陳瑞聞報致仕催臣交代
臣即馳至蒼梧駐劄據帶管廣西蒼梧兵巡道右

參政葉朝陽廣東嶺西兵巡道右參政徐汝翼羅
定兵備道僉事侯應爵鎮守廣東總兵官黃應甲
各呈揭前情臣當即檄行道參等官督兵星馳捕
禦一面將各官釀亂緣由具本題

請臣行據嶺西兵巡道右參政徐汝翼羅定兵備道
僉事侯應爵接管僉事鄭人達會呈查得各叛兵
二月二十日乘機倡變者先二百五十餘人自長
春墟起至富祿渣洞榭陂託崗坪崗大寨沿路各
村捉去男婦一十七口贖回五口追回給領一十

二名殺死八名口殺虜猪牛衣物不等燒燬營房
七處殺死塘報一名潘順二十二晚至富霖所城
外屯劄陳副總兵次早黎明帶兵追殺查實斬獲
黃玉等一百餘名招回陳恩等四十餘名尚有諸
大用丘如鴻陳汝清等一百餘名逃散因有本山
革退哨長陳仰泉即陳東毛甲頭即毛勝向在富
霖霖陂居住又有諸前峰即諸魁諸雙橋即諸君
用何少峰即何亮先亦各充東山哨隊長陸續革
退與熟識素厚諸少崖即張乾蕭德諸應元即羅

應元諸亞長卽羅亞長父子各投在屯種把總張
槐所轄龍埭相思胡崗膠村等處耕住時諸大用
等因見彼處窮崖絕谷便於爲盜易於隱藏遂湊
同毛勝陳東等陸續投附諸魁張槐等以佃耕爲
名因而造謀出劫羅應元張乾原俱係嶺東撫民
曾在廣西陸川往來各得知陸川城外北街富戶
頗多可以劫財約諸魁等即糾各崗耕佃陳一茂
等八十餘人以一茂爲賊甲長又糾鐵崗徭甲麥
亞長同弟麥亞賢帶領徭人四十餘名衆見諸魁

等各平昔梟雄推爲頭領諸魁以大總稱僞號飛
龍諸君用以二總稱僞號飛虎諸大用以亞總稱
張乾以三總稱丘如鴻原充書記以書總稱素性
貪殘又號爲老虎羅應元以哨總稱毛勝以甲總
稱陳東以隊總稱蕭德以協總稱於閏二月十二
日日相思胡崗由文子山起程張槐資以酒米贈
以旗幟仍令家人亞婆仔跟同前去續至黃孛圍
有常遠即常文遠糾賊常朝綱等二十八名至平
實木欄圍有撫賊蘇亞馮男蘇連塘又糾黨籬頭

甥等六十餘人至中路掘崗有守備歐泮管下哨
守隊長張龍楊達因見錢糧尅減遂倡同哨兵鄧
聰等一十九人叛投諸魁等合夥同行經過茂名
縣隆順鄉有帶管巡捕驛丞鄧裕督會總譚能等
截獲賊犯陳本善等三名斬級一顆奪刀三張及
至廣西徑往陸川城外打劫學前北街鄉宦陳教
官等家財物殺死兵民男婦二十三名口虜去男
婦一百三十三名口退回三十里屯劄勒贖悉憑
羅應元作眼視其貧富定以贖金放回一百零九

名口押帶回巢二十四口該縣督發巡檢侯仕廣
哨官李全把總樓大啓等各領兵截捕一面飛報
軍門督行叅將白玉督兵馳擊生擒賊徒一名諸
五九斬獲賊級三顆奪獲藤帽一頂大旗一面刀
二把各賊見兵追逼仍遁回廣東經過陽春縣地
方有招主劉玉鑑兵目陳朝立等生擒賊徒葉進
等三名餘各潛入深岨山仍從文子山散回原巢
隨該副總兵陳璘督發官兵於賊行總路裝伏擒
獲賊首亞總諸大用書總丘如鴻從賊陳遂莫廷

裕等六名又降賊一名蕭富審稱諸魁等見糾徒黨又欲出劫陽春街城遂約會各山剋期初七日進剿移報二道議委陽春縣知縣黃憲清隨軍紀驗比有東安縣報稱張槐於初五日招引叛兵一宗在龍涌濛村等處豎旗放炮等情該道督行副總兵陳璘就近查實計處該副一面統督把總千戶伍志等各官兵於初七日五鼓直抵旱腦濛村賊巢時賊先已聞風逃住鐵崗後山復督官兵分枝追趕衆賊褻險憑危拚死迎敵官兵益加奮勇

由坑仰攻陳銘親斬賊首二總諸飛虎卽諸雙橋
的名諸君用割級一顆賊勢挫衄我兵乘勝夾擊
有中軍官陳榜部下哨官潘麒麟等生擒賊徒劉
應等八名斬級二顆奪獲賊馬二匹各賊披靡散
遁該帶管中路遊擊李棟督守備歐泮統領總哨
官兵在於雲黎思賀等山擒獲從賊潘毛龍等二
十二名賊屬婦女三口守備歐泮親督塘報健步
周勝等擒獲從賊林惠明孔賢等十一名西山遊
擊葉歡統督官兵於霧水雙合等山擒獲從賊陳

汝靖鄧聰等五名器仗十件獲賊麥亞賢一名副
總兵陳璘又督哨官陳朝貴等生擒賊首隊長毛
甲頭即毛勝一名及訪實張槐窩縱各賊坐地分
贓密行擒獲比有賊首哨總陳仰泉即陳東與同
黨馬進等逃往新興縣地方藏躲該縣城兵緝知
捉拏陳東仍持刃傷死城兵一名有羅昌等奮勇
拏獲并奪倭刀一張巡捕典史金端於各街內搜
獲從賊馬進等三名窩家李應龍等二名有賊首
諸魁與張龍等帶同殺敗餘黨遁入魚跳山石崗

險巢藏匿副總兵陳璘復督兵四面布伏圍守未
下各賊遂用木牌告撫該副總兵陳璘即差百戶
陳銘入巢坐鎮宣諭軍門德意許其自新就據諸
魁何亮親出投見審各自願充兵發編隊伍移出
龍埔居住隨將諸魁改名王勇假以哨官名色以
安其心呈奉軍門憲牌行道委官張國威公同該
副查點安插比陳璘添差千戶伍志兼同委官張
國威前去各賊又移巢寧水地方陽招陰叛仍將
二官羈留復請給相思胡崗田地且椎牛饗衆殺

人祭旗名雖投招意在必逞又該僉事侯應爵於五月初九日移劄南鄉就近料理會同嶺西道叅政徐汝翼議謂各酋暴橫恃在險窩容利在田姑且餌之遣牌徑差督陣徐華入巢給以田土諸魁等隨將張國威伍志放出仍留陳銘在內本官陰行反間協總蕭德等自將賊首何亮謀殺訖各賊仍復陰謀於十七日徙營擁百戶陳銘出劫陳璘探知馳報二道又行該副一面發兵掩擊一面密通陳銘內應該副親統千戶伍志等各督官兵於

十六夜會雨下如注雲霧晦冥密抵巢邊伏至五更以銃響爲號各兵四面攻進陳銘於內殺出與家丁各斬賊級一顆各賊率衆死戰我兵對敵當陣斬級三十一顆生擒賊人郭子明等五名奪獲被虜男婦大小二十二口賊婦男女八口器仗五十四件被傷哨官劉威哨隊兵共十四名時有諸魁蕭德等仍奮臂衝前奪路脫走該副飛報二道看得刺虎不斃爲禍益烈遂購以重賞專擒首惡諸魁餘黨照前撫處有能計縛出獻者准免其死

有賊黨胡隆李景忠鍾仁等遵示擒縛諸魁於二
十一日投送副總兵陳璘審實收候仍督官兵四
往追緝擒獲賊首張乾羅應元蕭德弁從賊郭亮
等十九名又阮德等三名斬級三顆被虜二口賊
屬十口賊仗二十七件遊擊葉歡督兵生擒從賊
常公孝李德祐楊貴等十一名被虜一口原任都
司慕學督兵生擒從賊王公亮等三名賊屬五口
二十六等日副總兵陳璘遊擊葉歡原任都司慕
學等又各督兵搜獲賊甲一名陳一茂從賊曹聲

子楊二王顯金張生籬頭甥常特朝曹貴等十八
名斬級三顆被虜三口賊屬婦女七口沙水牛七
頭刀一把陽春縣督招主目兵擒獲賊徒張貴等
七名斬級六顆以上生擒賊級陸續解發委官知
縣黃憲清并肇慶府推官唐民敏各審驗及將各
生擒首從賊犯發該府知府王泮同知董石重覆
查審無異所據各該效勞人員呈乞敘議等因併
將功罪官員開呈到臣通計前後擒斬首從賊人
賊級共一百九十九名顆俘獲賊屬三十三名口

馬二匹牛七頭賊仗一百件奪回被虜二十八名
口招撫各殘徒四百餘名生擒賊犯內首惡諸魁
諸大用張乾丘如鴻諸應元毛勝蕭德陳東陳一
茂麥亞賢十名據二道押解到臣適該巡按御史
鄧鍊巡歷肇慶該臣會審情真且各賊狡黠異常
情狀叵測恐生他虞遵照兵部原題

准嚴法令以靖地方事例差官押赴市曹處決訖賊
級驗明梟示其餘從賊照舊監候賊屬馬匹變價
充賞被虜人口給親收領被傷兵夫處給湯藥恤

治外該臣會同巡按廣東監察御史鄧鍊照得賊首諸魁等本以賤卒久蓄禍心糾合浪狴肆行叛亂名雖止于數百勢實連乎諸巢始焉豕突陸川流毒甚慘繼乃蜂屯窟穴爲謀尤深假告招而執留委官仍分黨以潛掠近地此其漸不可長而罪誠不容誅者也若非各路防禦之嚴諸巢撫諭之早其糾結煽動滋蔓難圖不惟新造之區反側可慮而旁近郡邑其被荼毒之害有不可勝言者矣該先後按臣羅應鶴鄧鍊與臣各具奏

聞仍各祇奉

德意申嚴禁諭期於殲除元惡姑宥脅從卒之猥黨
分携兇強奪魄渠魁悉就俘縛餘黨並用撫擒境
宇戢寧民夷安堵皆仰仗

聖武布昭

廟謨宏遠之所致也臣待罪封疆上藉

德威得免譴戾不勝悚幸所據一時文武官員相應
分別功罪以示激勵如整飭兵備兼分巡嶺西道
廣東布政司右叅政兼按察司僉事徐汝翼念切

民艱動符兵計懋撫安攘之畧聿成底定之勛廣
東按察司整飭羅定兵備道加陞四品服色僉事
報陞貴州叅議今降調侯應爵衡慮困心運機達
變惟夙夜之匪懈致氛祲之全銷鎮守廣東地方
總兵官左軍都督府都督僉事黃應甲忠誠素抱
兵徭情狀周知號令分明撫勦機宜不爽此三臣
者均應紀敘賞賚而侯應爵八載憂勤一時註誤
雖已聞報向在軍中似應量復原職以恤其草創
之勞者也廣西布政司右叅政兼按察司僉事整

飭府江兵巡帶管蒼梧守巡道事葉朝陽當寇攘
之勦勦謀猷審固值道務之叢委調度雍容新任
羅定兵備道僉事鄭人達聞

命急趨分猷共念討叛之勞未與善後之策多資此
二臣者應併從敘賚者也分守廣東東山副總兵
管叅將事署都指揮僉事今革職充爲事官陳璘
挺身獨任欲求過於東隅冒險先登幾甘心於白
刃分守廣東西山地方管叅將事遊擊將軍署都
指揮僉事今革任侯勘葉歡始而稱病本有推避

之心繼而臨戎並著撫擒之績此二臣者陳璘致
變有因論功難泯應候勅

報俟該部議處葉歡罪固難辭功亦足錄併應准贖
者也分守廣西潯梧地方叅將署都指揮僉事白
玉憤鄰寇而志銳驅除奉軍令而師無留宿廣東
練兵遊擊將軍署都指揮僉事李棟攝西山懋著
先聲之勇管中路共臻戡定之勲此二臣者應併
從賞賚者也廣東肇慶府知府王泮性資沉毅而
裕經濟之猷同知董石智識精明而嚴首從之別

推官唐民敏鞫訊周詳而防閑更肅陽春縣知縣黃憲清紀驗勤謹而議處有條此四臣者併應賞賚而唐民敏尤效勤勞者也守備中路地方以都指揮體統行事指揮使今聽勘歐洋變起部兵撫擒亦與有力東山右營把總富霖所百戶陳銘身羈賊壘間誘僅效微勞此二臣者功微罪重難以遽贖應候提勘姑從末減者也廣東東安縣知縣陳公大哨兵始變殊乏先事之防廣西陸川縣知縣田升鄰寇方張難逃失事之咎但陳公大已奉

旨罰俸由升應併從罰治以示儆戒者也此外軍前
用事委管中路守備事原任都司慕學與哨隊效
勞千百戶把總伍志吳廣劉元威吳應龍等俱聽
臣分別量行獎賞以勵勤勞及陸川失事總哨等
官侯仕廣杜熊兆等臣已徑行拏究其兩山善後
事宜如控扼險要選領屯種寬恤民徭驅逐遊浪
編立保甲清查冒濫禁戢尅減等項容臣嚴督舉
行俱不敢一一煩

瀆伏乞

勅下兵部查議乞將前項官員功罪查議擬上
請俯賜施行庶勸懲旣明而人心益勵矣

境內大臣病故疏

題爲境內大臣病故事據廣東布政使司呈奉前
任督撫臣陳瑞批據潮州府海陽縣申報原任工
部左侍郎陳一松萬曆十年七月初七日在家病
故緣由奉批仰廣東布政司查例詳報依奉該本
司看得原任左侍郎陳一松質比金玉學有淵源
文章政事兼優宦譽鄉評並茂給假回籍今旣考

終所有應得恤典伏乞裁議具

題等因具呈到臣該臣會同巡按廣東監察御史鄧
鍊看得原任工部左侍郎陳一松起家秘翰躋秩
貳卿中外歷剔政譽久孚於士論泉丘晦養安貞
無玷于鄉評相應遵照題

准事理據實開列聽該部查例議擬臣等不敢擅便
謹具題

知

條議艚船鹽法事宜疏

題爲議復艚船以通商販以永靖海氛事據廣東
布政使司呈奉撫按衙門案驗前事依奉該本司
掌印左布政使王元敬會同按察司掌印按察使
周之屏廣州巡海并兼管鹽法道副使朱象光將
艚船鹽法各事宜逐一會議停當列欵伏乞裁奪
等因又據廣西布政使司會同司道議詳各備呈
到臣據此卷查先准戶部咨該前任總督兩廣兵
部尚書兼都察院左副都御史陳瑞題前事又該
吏科都給事中尹瑾題爲極陳艚船利害懇乞

聖恩軫念瀕海以安地方生靈等該部覆議合候

命下本部移咨兩廣督撫并廣西巡撫都御史及咨
都察院轉行廣東廣西各巡按御史督同二省司
道等官逐一詳議要見烏艚橫江等船先年原未
禁止近日何以不行今如准行將來勾引倭夷之
患作何禁止廣西軍餉原取辦於運鹽今廣東商
船既開鹽引加增則連韶等處禁弛官鹽益阻作
何疏通如廣西官鹽不行軍餉匱乏作何處補通
行會議明悉務要惠利通於兩省軍餉不失乎原

額與原奉

明旨無礙列欵會題限萬曆十一年二月具

奏前來以憑覆

請定奪若中間有事體當更彼此不便者亦要明白
直陳勿求便一隅而遺兩省之害勿止計目前而
忽意外之防至於廣東巡撫兼督廣西尤當虛心
審處以求兼利不可計此遺彼以貽後艱等因題
奉

聖旨是欽此移咨前來已該前任督任督臣陳瑞案

行兩廣布政司會同各司道查議未報續該臣到任又經催行會議去後今據前因該臣會同巡撫廣西地方兵部右侍郎兼都察院右僉都御史吳文華巡按廣東監察御史鄧鍊巡按廣西監察御史馬呈圖議照得天下一家無分爾汝兩粵毗連義同休戚廣西官鹽之議非一日矣大抵通於東省則窒於西粵盛於商販則阻於官運况節奉明旨不許再議紛更西粵地方仰賴尤切此官鹽所當照舊買運設法疏通者也至於艚船一節亦嶺

海之巨防商民之阜利但查自前督臣陳具題
之後一向號召至今並未有應之者蓋商民懲往
時之害未信今日之利本不待禁而自不肯爲之
矣茲該司道等官會議前來復該臣等叅酌僉同
相應遵照列欵題

請如蒙伏乞

勅下該部再加查酌覆議上
請行臣等遵奉施行謹題請

旨

計開

一議艚船據廣東布政司開稱查得先奉總督
兩廣軍門陳瑞明文議復艚船凡昔所謂刷
虜遠調免差徵銀輪班出哨諸弊並永禁絕
然自詳允頒示迄今未見商民樂從蓋強人
以所不欲則法難行因民之所樂從則事易
集爲今之計相應聽從民便凡民間願造艚
船販鹽運貨者許赴軍門或巡海道告給牌
照造完在廣營赴刷虜等弊並行禁止不願

造船者聽不必以官法強之至於恐姦人駕
船默抵倭島勾引爲患誠爲遠慮但艚船之
費大者數至千金其貨本尚未與焉必身家
富實乃克舉此向來亦未有此輩潛勾倭患
等因到臣復該臣等看得前項艚船罄於刷
虜征調之煩困於哨守納稅之苦是致歷年
以來磨滅漸盡即近該前督臣殷正茂議給
官本打造至今本銀未完拘累尤甚故茲雖
欲號召無有復應之者蓋人非利不往矧以

害隨之乎往歲初開艚船民知其利未知其
害富民靡不捐貲合本爭趨造運近年興販
之利既微成調之苦尤大民見其害不見其
利即使官給本銀造船使之裝運還本民且
不肯應况捐貲自造乎故官府向無禁絕之
文而民間鮮有興造之實卽如該司頒示刷
虜諸弊並禁絕矣卒未有應之者豈非憚工
力之鉅懲利息之微哉其句引倭夷一節據
稱船貨之本大則身家必惜連坐之法嚴則

同幫不容向來資其禦盜未犯句引但恐機
智生於習慣法度弛於因循亦當長慮却顧
應照該司所議艚船願造者聽從民便不願
者不强其稽察關防編號連坐之法申飭謹
嚴往還投驗以杜句引之萌如有通番貨物
違禁者照律問罪似得阜利禁奸之道今後
但有告造之者除運貨照議外其餘運鹽亦
止許在本省貿遷庶官運無阻而稽察亦便
伏乞

聖裁

一議鹽法擬廣東布政司開稱查得原議廣西官販海鹽初議每年三運續止一年一運廣東韶連二路每年限拆鹽引三千六百道續奉前軍門批據本司會同司道議將韶連二路量添一千四百引今吏科都給事中尹瑾欲將官鹽議罷其廣西軍餉令廣東照數處補但廣東餉銀日縮措處亦難而廣西官運

節奉

明旨合當遵行等因到臣復該臣等看得廣東廣西

均一

王土官運商運同一納餉但官運則利在西商運則
利在東然廣西則爲地方計廣東則爲商民
計正該部所謂阻利於民商者小而減於軍
餉者大矧官運節奉

明旨不許再議紛更委應照舊其韶連二路引鹽仍
止許拆引三千六百道此外續增鹽引與私
販攬越者悉行禁革惟有挑背負者不在此

限庶官運易行西餉不置至於江海袁臨二
府行鹽地方彼中久有成議亦難更張其餘
過限坐割等弊業經申明寬假無容別議及
科臣尹瑾疏開巡海哨官以巡鹽爲利恐嚇
索害各商及稱廣西以提舉官親至廣州買
鹽將至預禁艚船賣鹽旣至勒令艚船賤賣
強用大秤勒索加鹽各項弊端俱該臣等督
行鹽法道轉行提舉司公同時價收買兩平
交易照依布政司銅錘官秤諸弊嚴行禁絕

敢有故違容臣等按法究治臣又查得東省
產鹽地方夏秋風日晴明鹽易煎晒其價較
賤春冬其價必貴而廣西發銀買鹽必俟一
運交割發賣而後申請再支遲延展轉往往
在於秋盡冬初正值鹽價騰貴之時又每運
該鹽五萬四千四百五十四包委之一官一
齊輸運是收買既已後時價值必至涌貴東
商有虧折之訴委官有守候之難至買完運
回又值春夏之交江灘水漲牽挽甚艱非三

四月不能至省間有損失未免攤陪及所費
工本既多則發賣之價又不得不取足八錢
因之而愈多堆積議者至謂官鹽無利有害
者多由於此况梧州蓋造鹽廠房屋數多俱
各見在專爲停頓官鹽聽候廣西委官陸續
轉運所宜就中酌處使公私不致稱病合無
備行廣西布政司及鹽法道每年俱於五月
內卽將鹽本銀兩支出給付運鹽副提舉并
另委一官兼同領解赴臣衙門投文給付公

文前往廣東鹽法道轉發提舉司收候遇鹽
價極賤之時即照價儘其銀兩公同收買不
必盡拘原議包數完日僱倩船隻給與腳價
運至梧州府收貯鹽廠聽候廣西委官至梧
用淺水船隻陸續般運不必多用大船致有
失誤其鹽價收買既平則發賣即可酌減亦
不必拘定八錢之數官商兩便似在可行伏
乞

聖裁

恭謝 欽賞疏

奏爲恭謝

天恩事准兵部咨談本部題覆臣原題爲叛兵糾結
撫猺流毒鄰境仰遵

明旨分別撫剿寧戢事緣由節奉

聖旨郭應聘賞銀三十兩紵絲二表裏欽此欽遵移
咨前來隨於本年十一月初九日談臣原差承差
霍仕鵬領齎前項銀兩表裏到臣臣即望

闕叩頭祇領訖伏念臣猥以駑庸未閑軍旅甫叨

新命叛卒已騷動于兩山旋莅蒼梧羣醜倏狼奔乎
陸邑浪狴附和遐邇震驚仰賴

帝德弘敷重以

廟謨指授宣

威稜而靖亂兇孽就擒體

誠信以招攜疆隅者定茲惟常職敢云發蹤之功詎
荷

洪慈爰下

駢蕃之錫珍分

內帑祥光耀日以輝煌錦出

天機彩色絢霞而燦爛捫心增愧戴

德難名臣敢不益勵素衷勉圖後效捧金作礪矢精
白之靡渝束衽知榮期絲毫之少補臣無任瞻

天仰

聖感激屏營之至謹具奏

聞

勘報安南地界疏

題爲疆州被苦擾疆地被侵割乞

天恩垂憐拯救事准兵部咨該安南都統使司都統使莫茂洽奏前事兵科叅出本部覆議合候

命下本部移文兩廣總督會同巡按御史將莫茂洽所奏情節并該科叅出事理即便選委廉幹官員親詣各州地方從公踏勘要見某州界限某處某村隸屬某州中間接壤地方某係從來額制見今從何管屬各州有無侵占歸附果否用力開荒隔疆地土應否用價置買助兵救殺何至界地酬勞備查前後詳細叅酌應屬外夷者斷歸外夷應屬

各州者斷歸各州逐一處分明白具由回
奏等因題奉

聖旨這事著總督撫按官從公勘處停當具奏欽此
已經轉行廣西巡撫衙門一體欽遵查照及通行
勘處去後催據廣西按察司呈據推官李遠葉蒸
會勘報司該本司會同左右兩江守巡各道覆詳
看得土夷異域而接壤內外凡有血氣長子孫於
中者皆食

王土之毛則皆臣服於

天朝故幅員之延袤江壑之綿亘惟

天朝掌握之土人固不得稱爲故物交人亦不得攘
爲已有也乃今土夷不揣互混疆場各持參商頗
年莫決在州峒方執稱已管於莫氏未篡之前在
交南欲挾奏以取於陳黎繼亡之後未免下亂分
土上瀆

聰聽干紀匪細若及今不與之就中處分則不惟三
面鼎立其地者未有歸一即部落生聚於叢莽密
菁之間者亦終無定主日尋騷屑何以安土而樂

業也今查奏內除安南所稱全膝虎耽二所勘無
基址與巖崗奏內未開且係下雷內地無容別議
外如云下雷所占下琅鄧蕩等村查謂曾經勘斷
本峒給有印信下帖又云占上琅邕丹等村查謂
係本崗強據爲質以脅安南邕經等村還峒皆屬
有因茲據委官議取天然爲界鄧蕩之十三村以
穿巖限之巖以內鄧蕩等八村屬下雷巖以外獨
洗等五村屬安南邕丹等之十一村以江水分之
江以北邕丹等五村屬下雷江以西哀音等六村

屬安南以此分之雖多寡錯落界限截然裂土不
苦於徙村分轄更便於統括矣如云歸順所占泡
泉等社查謂社內係該州用價贖回四社又隴淀
等社社內有所屬莽排等札義等村皆本州奉有
勘斷在案又云占茶嶺那造等甲查謂甲內係閉
醴泉兄弟自相屠戮求援歸順有功以酬其勞祿
架等村查謂係本州祖岑氏因荒開墾立石爲界
亦屬有因茲該委官議將泡泉等陸社以江水爲
界江以北莽排等十六村與祿架等五村仍給歸

順其泡泉江以南札義等五村茶嶺等六甲與舊
斷安南內光外光等四甲果脫等三社近爲歸順
所侵者俱勒令吐退給還安南以此分之雖裒益
參差疆域寔正弱肉無容強食私便不敢公逞矣
其安南與下雷構殺劫虜等情旣查勘附近居民
無恙委係土夷捏詞莫茂洽所奏上下光榔二莊
被忠州占據今審甲澂自認錯寫免勘不必深求
等因備呈到臣時廣西巡按御史尚未入境該臣
會同巡撫廣西地方兵部右侍郎兼都察院右僉

都御史今改刑部右侍郎候代吳文華議照荒服之制固所當明而夷夏之情均不可拂今安南與下雷歸順等州尚向因壤地毗連加之世代更易各懷侵削之謀屢肆讎爭之害如鄧蕩等村在安南則稱屬關隘之南在下雷又稱係祖業安南旣占下雷之邕鸞等十一村于先而下雷復據安南之邕丹等十一村爲質泡泉等社原屬歸順管轄先爲安南所侵用價始贖朗寧等甲係安南地方又爲歸順占管藉口酬勞彼此構爭由來久矣茲

談臣等仰體

廟堂綏柔德意督行司道委官秉公查勘期於處分
停安庶

天朝之體統益尊而邊土之民夷可舉安也所擬該
司開報除全滕虎眈二所原無基址嶺崗未載奏
內查係下雷內地與上下桄榔二莊先已斷還今
甲澂自認錯寫免勘外如鄧蕩等十三村議以穿
巖爲界巖之內鄧蕩柯巧龍蒲通蓬供村吟邦八
村屬于下雷巖之外獨洗雅江丘丘五村屬于安

南其邕丹等十一村則以江水爲限江之北邕丹
上下傍伏良亂五村屬于下雷江之西那哀野斷
某郡音村共六村屬于安南又泡泉等六社所屬
地方亦以江水分之江之北莽排崑米喉隴那馬
弄隆告蒙多泥邕替那弄泮漕邕嵩邕容凌浪邕
冊邕何邕空共十六村給于歸順江之南札義多
邊邕啼打落箇定五村給與安南其茶嶺那造朗
寧拔立弄隆六甲與舊斷內光外光上坤啼定四
甲果脫彤管玉管三社俱退還安南祿架祿郡孤

古沱泓邑米五村仍給歸順中間裒益多寡雖有不同要皆順民之情因地之利隨宜分屬原無軒輊于其間者既經南太二府并委官重覆勘處又該司道各官會議僉妥相應俯從其二比構殺一節查勘附近鄉民無恙委係捏詞念係土夷無知姑免深究伏乞

勅下該部再加查議上

請定奪行臣等轉行該司道二州崗與安南都統使司各欽遵查照分定疆土依界保守不得縱容部

曲復行踰越構釁其塞巖豎碑事宜另委官員次第舉行惟復別奉

定奪謹題請

旨

郭襄靖公遺集卷之七終